





大清文宗協天翊運執中垂謨懋德振武聖孝淵恭端仁寬敏
顯皇帝實錄卷之三十

咸豐元年辛亥三月癸卯

上御撫辰殿閱官員兵丁等射。至乙巳皆如之。○諭內閣。朕因
廣西勦匪半載以來。尚未掃除淨盡。誠恐匪黨滋蔓愈多。民
生窮蹙益甚。特命大學士賽尚阿。及都統巴清德。副都統達
洪阿。揀帶官兵。馳往防堵。楚粵之交。地居扼要。必得重臣駐
劄調度。既防竄擾。藉作聲援。當即寄諭李星沅。周天爵。向榮
等。不得以特派有人。稍存觀望。仍當督率將士。激勵紳民。協
力殲擒。剋期掃蕩。在廣西士民聞有此旨。定知朝廷眷念邊

疆不安宵旰。無不奮迅感激。志切同仇。即各路調集兵勇。亦可知重兵在後。益振軍威。士氣既揚。賊鋒自挫。如賽尚阿等未到以前。業已馳報捷音。肅清各郡。李星沅等奏績行間。自當渥膺懋賞。賽尚阿等亦即可振旅而還。以慰朕望。第恐中外臣民未喻斯意。特用明白宣示。俾知朕命將出師。不欲我民之久遭蹂躪。而又慮徵調過多。不免滋累。於綏疆靖寇之意。固一日不能釋也。將此通諭知之。○又諭。前有旨派大學士賽尚阿等酌帶官兵馳往湖南。督辦防堵事宜。旋經賽尚阿等酌派征兵二百名。隨兵四十名。管帶火器。並章京司員等。不日由京分起前進。朕思人數眾多。經由驛站。易滋騷擾。

著賽尚阿等飭令隨往文武各員。毋得多帶跟役。並嚴諭兵役人等。沿途行走。毋許藉端挑斥訛索。從前征兵過境。往往包帶客貨。多用民夫。甚至廣占民房。陵辱州縣。種種弊端。皆所不免。朕知賽尚阿向來出差。頗能約束。此次分起出都。特諭賽尚阿於最後啟程。著即沿途探訪。留心稽查。儻有滋擾各弊。無論係何人所帶兵役。立即截留。按律懲辦。並將管束不嚴之員。指名叅奏。毋稍徇隱。至各省州縣地方。支應兵差。例有明文。儻有意存見好。濫行應付。並著賽尚阿一併嚴查。隨時奏辦。毋負朕諄諄誥誡之意。將此通諭知之。○又諭。昨因賽尚阿出差。特旨將內閣侍讀穆蔭開缺。以五品京堂候

補在軍機大臣上學習行走。穆蔭係軍機章京行走多年。尚稱熟悉。故令隨同學習。藉資造就。茲據給事中蘇廷魁奏稱。超擢太驟。易啟倖進之門。已不成話。併稱俟賽尚阿回京後。仍令該員回章京當差。黜陟自下。巧為嘗試。尤屬亂道。該給事中人甚端方。此奏似不出其手。但所言尚無大謬。姑置不問。夫軍機大臣。本為要任。滿漢兼用。斷不應稍有區別。朕用人行政。一秉大公。從無分於滿漢。穆蔭人亦中材。朕本欲添派滿洲軍機大臣。惟內斷於心。親加選擢。黜陟大柄。朕自持之。非諸臣所可輕議也。用是明白宣示。使知朕意。○烏嚕木齊都統毓書等奏。酌添擡槍六十桿。分給各協挑選精兵一

律練習。報聞。○命前任太常寺卿唐鑑來京聽候召見。○命江蘇淮揚道嚴正基。馳往廣西軍營。辦理糧臺事務。○甲辰。

上詣

壽康宮。問

皇貴太妃安。○諭軍機大臣等。李星沅等奏。分勦賊匪情形。各摺片。周天爵於進勦武宣東鄉逆匪時。手刃退走閩勇二人。親督東勇前進。殲斃賊匪數十人。看其精神矍鑠。並非老不能軍。現既親歷戎行。著即專辦軍務。帶兵督勦。俾得殫竭血誠。捷音迅奏。惟逆匪自牛排嶺潰竄之後。直走武宣一帶。距桂林不遠。省垣重地。尤宜加意防守。著該大臣等。體察情形。

一面兜捕。一面嚴防。斷不可稍有疏虞。致匪徒乘間而入。昨有旨命賽尚阿等帶領官兵。前往湖南廣西之交防堵。並添調四川兵三千名。飭部另籌軍餉一百萬兩。有此聲援。賊必聞而膽落。攻勦更易得手。所有續調楚皖滇黔官兵四千名。本日又由四百里分飭迅速赴粵。大兵雲集。併力夾攻。自不難迅掃欃槍。肅清各郡。該大臣居中調度。周天爵向榮謀勇兼施。務當同心勦力。計出萬全。早紓宵旰焦思。方不負此重任也。再自軍興以來。該省輿地。並未繪圖貼說呈覽。著即詳細繪一全圖。將水陸道里遠近。山川險隘。與隣省何處毗連。各股賊匪竄踞何處。逐一註明。迅速呈奏。將此由四百里各

諭令知之。○以廣西布政使勞崇光暫署巡撫。○以勦辦廣西武宣賊匪獲勝。賞都司鄭魁士。花翎。餘升敘有差。予陣亡遊擊謝陞恩。祭葬。世職如副將例。把總曾朝玉。袁國璘。外委李元吉。州同蘇勒芳。阿州判李懋華。從九品吳貽書。祭葬。世職。○調四川兵二千名。赴廣西湖南交界處所防堵。○乙巳。上詣

壽皇殿行禮。○丙午。

上御撫辰殿。陳帟帳步射。並閱王大臣侍衛等射。○諭內閣。慶祺。朱樽。奏請飭催南糧。起運幫船等語。近年各省幫船。受兌開行。總未能趕符定限。以致迎幫剝運。殊費周章。上年甚至

將剝船凍阻河干打冰行走。又復截卸北倉實屬不成事體。本年辦理新漕。自應提前趕辦。現在江蘇浙江首幫軍船已報先後開行。如各省幫船到淮。在江浙等幫之先。應否不拘次序。隨即盤驗放行。著楊殿邦相機辦理。總期跟接北上。毋許一幫脫空。稍形遲滯。並著沿河各督撫。仍遵前旨。飭屬催提。並遴委妥員。督同地方文武。實力趲催。以速漕行。而符定限。○諭軍機大臣等。步軍統領奏。拏獲攜帶經卷。形跡可疑之貴州民人劉泳壽。請交部審辦。並訊據該犯供稱。普安州龍土司之子龍冬。係廣西土匪頭目。現帶土匪數千。在廣西滋事。龍土司與其表弟張滿千歲。結交土匪。搶奪財物。送往

廣西賊匪等語。著喬用遷。飭即嚴查該土司父子。有無通匪滋事實蹟。確切提究。一面先行覆奏。原摺著鈔給閱看。將此諭令知之。尋奏。遵查龍冬。並非土司之子。實無勾通土匪情事。下部知之。○丁未。

上詣

壽康宮問

皇貴太妃安。○諭軍機大臣等。寄諭兩廣總督徐廣縉等。前因江西南贛各屬。多與粵省毗連。飭令該省地方官。嚴密防堵。茲據陸應穀奏稱。廣東巡撫。以首要各犯。就擒。咨行江西。將防堵弁兵撤回。各等語。該督等。勦辦清遠英德匪徒。如已蕪

事自應將現在情形先行奏報。此次擒獲首要各犯業已咨令江西撤防。何以該督等尚未奏到。現在該處匪徒是否全就肅清。鄰省接壤之區。防堵各兵果否應撤。著該督等迅將現辦情形詳細奏聞。以慰朕念。並著悉心體察。如尚有餘黨竄擾他處。即行飛咨鄰省一體嚴防。無稍疏虞。將此由四百里諭令知之。○又諭陸應穀奏粵東匪徒次第就擒。現撤防兵歸伍一摺。江西南贛一帶前因堵禦粵匪節經擊退。茲據稱該匪屢挫。餘黨逃竄。邊境肅清。並據廣東巡撫以首要各犯就擒。咨行江西將防堵弁兵撤回各等語。現在廣東清遠英德一帶軍務尚未奏報完竣。該省接壤之處恐尚有逃匪

隱伏。尚須加意巡防。著陸應穀察看情形。飭屬認真查緝。勿使餘匪乘間再有竄擾。至該省防禦出力之文武員弁著俟廣東奏報完竣再行奏請。將此由四百里諭令知之。○又諭據琦善奏遵旨歷陳番夷及內地實在情形。豫籌立法一摺。並將分別查詢各事宜開單呈覽。該處善後事宜即著該督悉心體察酌定章程具奏。總期蒙番雜處之區。經此次籌畫防維可以久安無事。是為至要。將此諭令知之。○兩江總督陸建瀛奏遵查沿江水道阻遏情形。因沮洳之處種柳種蘆。致令水停沙聚。擬於每年春夏之間委員查勘。如有壅種立予嚴辦。得旨種洲必應嚴禁。每年查勘不可視為具文。○戊

申命熱河都統賡福在紫禁城騎馬○己酉閩浙總督裕泰
奏漳泉會匪已獲要犯多名現在提省審辦並密派委員赴
臺查禁私礦得旨現獲各犯嚴行審訊從重定擬斷不可因
有嘆夷照會稍有遷就亦不可濫及窮黎致生枝節朕調汝
閩督欲資整飭勿效劉韻珂之消弭亦不必過為見好沽虛
譽而無濟於實總之公事以公心辦毋存一己之私誌之○
以怡親王載垣克勤郡王慶惠兼十五善射大臣○命福建
巡撫徐繼畲來京陛見以閩浙總督裕泰兼署福建巡撫○
庚戌

上詣

壽康宮問

皇貴太妃安○諭內閣前署烏什辦事大臣文興於期年之內
鼓吹放礮實屬違制著照部議革職○辛亥諭內閣李星沅
周天爵奏遵查知縣自盡情形請將堵勒不力之營員懲辦
一摺廣西已革署富賀營都司李慶付於匪徒竄入賀縣之
時但以守城為詞並未下鄉堵捕至賊匪竄擾里松李慶付
督率把總劉大綱外委勞玉榮等帶兵抵禦復有損傷迨該
縣鶴年情急自縊又不能窮追賊蹤奮力勦洗實屬庸懦無
能李慶付著發往新疆充當苦差劉大綱勞玉榮均著革職
發往軍臺效力贖罪前署平樂協副將伊凌阿雖查無畏葸

縱賊各情。惟身膺專閫。於賊匪竄擾。未能迅速撲滅。實難辭咎。著交部議處。○諭軍機大臣等。李星沅。周天爵。向榮。馳奏進剿武宣逆匪。未能得手情形。並周天爵瀝陳病狀。與向榮會籌剿辦事宜各摺片。賊匪滋蔓日久。股數既多。勢不能旦夕埽殄。自宜妥籌戰守。以冀奏功。前此向榮屢獲勝仗。朕固日盼捷書。此次進剿武宣賊匪。互有勝負。秦定三所帶黔兵。能將身穿黃衣之大頭目。用槍擊斃。亦屬奮勇得力。該大臣等。仍當和衷共濟。盡力籌畫。務須計出萬全。不可再有挫失。固不必遽請議處也。周天爵身歷行間。朕素嘉其勇往。是以前旨令其專辦軍務。所有巡撫篆務。已命勞崇光暫署。周天

爵舊疾復作。朕深以為念。著即在營善為調理。祇須調度有方。正不在親自衝鋒禦侮。前命賽尚阿等馳往楚粵之交。正為廣西用兵。熟籌此舉。已飭調四川精兵三千名。先後馳往協剿。其餘鄰近各省官兵。有可酌調之處。該大臣等察看情形。徑行檄調。朕亦不為遙制。其湖南總兵李伏。遊擊成林。四川副將劉長清。均已諭令帶兵前往。並諭徐廣縉揀選精兵五百名。飭往備用。賽尚阿等未到廣西之前。該大臣等總當恪遵前旨。迅速籌剿。不可稍事遷延。觀望。其應如何籌守籌戰。先堵後剿。並度地勢設伏抄擊之處。該大臣與周天爵。向榮熟思審處。協力妥辦。庶慰朕懷。其大黃江賊營。撥獲逆書。

已由軍機大臣呈覽矣。將此由五百里各諭令知之。○又諭
前有旨令廣州滿洲副都統烏蘭泰馳驛前往廣西幫辦軍
務。現在正當勦捕喫緊之時。著該督等揀選綠營精兵五百
名。備帶適用器械。如烏蘭泰業已啟行。即遴派得力將弁管
帶。兼程赴粵西軍營聽候調遣。昨因陸應穀奏稱。接據葉名
琛咨會撤防。該督等何以至今尚未奏到。現在清遠英德一
帶情形究竟如何。著即詳細馳奏。以慰朕懷。其高廉一帶匪
徒。勦辦是否得手。著一併奏聞。廣西需兵孔亟。現已添調滇
黔楚蜀等兵前往。廣東清遠軍營。如已凱撤。兵勇似可移往
粵西協勦。至軍餉一節。雖已飭部寬為撥解。尚恐緩不濟急。

徐廣縉統轄兩省。自必通籌兼顧。無待朕再三諄諭也。將此
由五百里各諭令知之。○又諭前飭湖南省續調精兵一千
名。現在廣西需兵孔亟。著駱秉章迅即選派。星速前進。聽候
欽差大臣李星沅等調遣。並著派綏靖鎮總兵李伏提標左
營遊擊成林。統帶兼程前往。毋稍延緩。將此由五百里諭令
知之。○又諭前有旨。飭調四川精兵三千名。馳赴湖南廣西
交界。候賽尚阿到日調用。茲據李星沅等奏。飛咨四川挑兵
一千名。遴委總兵管帶。並請派督標副將劉長清。一同赴粵
等語。著徐澤醇即將初次所調川兵一千名。飭令劉長清帶
往廣西軍營。聽候李星沅等調遣。其二次續調川兵二千名。

即遵前旨選派得力將弁星速馳往楚粵交界處所候賽尚
阿調遣該督並將帶兵員名及何日啟程何日出境之處一
面由驛奏明一面飛咨欽差大臣賽尚阿及廣西軍營查照
毋得稍有遲誤將此由五百里諭令知之○又諭廣西勦辦
賊匪前已添調各省官兵並飭雲貴各續調精兵一千名諒
已選派迅速前往朕聞雲南土守備義勇巴圖魯左大雄前
在軍營出力極為勇往所轄土練亦甚精銳著張亮基察看
情形該土弁是否可以遠赴徵調其所管地方是否必須該
土弁彈壓如無窒礙之處即一面奏聞一面飛札飭令酌帶
得力土練數百名星速馳赴廣西聽候欽差大臣調遣可也

將此由五百里諭令知之○賞印務參領謙亨副都統銜為
伊犁領隊大臣○壬子

上詣

壽康宮問

皇貴太妃安○諭內閣前據御史王之斌奏參陝西白水縣知
縣徐良槐候補知縣江開各款當交琦善詳查具奏其餘良
槐刑押詐贓一案先據張祥河奏參革職嗣據王懿德審結
已交刑部議奏矣候補知縣江開在撫署閱看課卷校對本
章雖無與該撫飲酒之事惟於己酉科派充同考官將別房
薦而未中之卷代呈主司求中實屬故違功令臨潼縣知縣

鍾錫瑞將主司未中之卷用藍筆加以密圈密點亦屬不合。江開鍾錫瑞均著交部分別議處。至御史張廷瑞前叅該撫張祥河詩酒風流不理公事一節亦經琦善查明張祥河供京職時詩酒在所時有現在陝撫於一切公事並無延誤張祥河著毋庸置議。惟封疆大吏身膺簡畀自宜整躬率屬本不得有所偏好致屬員得以摩揣逢迎即文墨唱和結習未除亦恐有誤公事。清談廢務浮文妨要古所戒也。各省大吏其各勵精圖治專意從公無負朕諄諄訓誡至意。○又諭廣西勦辦賊匪籌調兵餉最為先務除該省陸續動用外前經李星沅等奏請飭部撥餉八十萬兩現復派大學士賽尚阿

為欽差大臣前往楚粵之交督辦防勦事宜調兵較多已飭部續撥餉銀一百萬兩星速解往以濟軍需自可收飽騰之效。惟念大兵雲集需用浩繁必應寬為儲備源源接濟使後路糧臺毫無支絀則兵心無內顧之憂奮迅勇往庶期速靖邊圉著再由內務府廣儲司給發內帑銀一百萬兩作速解赴大營備用。朕睽懷南服宵旰焦勞小醜一日不除粵民一日不靖不惜大發帑金饋餉轉運以殄羣盜而安善良諒該大臣等定能督飭領兵大員奮力攻勦迅速蕝事俾匪黨悉就殲滅邊陲立見肅清。用副朕靖寇綏疆之意。○又諭奕興奏覺羅呈控協領各情請解任送部會同審辦一摺覺羅貴

臣呈控水師營協領榮琪在省設局聚倡誘賭並以假鴉片煙土抵還賭債經該將軍派員查辦貴臣始則令親屬呈懇免究繼復稱病躲避種種殊多疑竇且指控各款所關綦重虛實均應徹底根究榮琪著暫行解任同覺羅貴臣一併交奕興會同景瀄研審確情按律定擬具奏尋奏遵審榮琪在金州海口拏獲廣東金永豐等船戶私販鴉片煙土將煙土一半解報上司一半運存私寓覺羅貴臣聽聞民人綽六告稱榮琪帶回煙土唆令貴臣誣賴與榮琪同賭藉端訛詐貴臣即捏寫榮琪聚倡誘賭以假煙土抵還賭債等詞控告榮琪擬發極邊煙瘴充軍覺羅貴臣擬發吉林安置下部議從

之○諭軍機大臣等琦善奏遵查馬廠地界請飭勘辦一摺莊浪滿營馬廠地面遼闊附近民番乘間開種迄今歷年已久廠地必應清理邊氓亦宜撫綏其應如何劃分界址定則升科總未議立章程殊非覈實經久之道著即派涼州副都統興泰並甘涼道等親往查勘由琦善覈明妥議章程會同興泰具奏至前此懷成奏懇查辦一摺興泰究竟因何不肯會銜著再確查具奏將此諭令知之○又諭四川沿江州縣舊存倉穀著徐澤醇分飭各屬迅即碾動湊足米五千石由水路運至湖南地方交該省轉送廣西一切費用准其作正開銷如一時碾動不及著即動項如數採買運往仍將碾動

倉穀湊足米五千石。豫備隨後撥運。毋得設詞藉口。有誤軍需。將此由五百里諭令知之。○湖北巡撫龔裕奏報。撥解軍餉。並籌辦防勦情形。得旨。防堵情形。隨時據實具奏。勿得稍事含混。○調四川兵一千四百名。赴湖南聽候調用。○癸丑諭內閣。周天爵著賞加總督銜。會同向榮專辦軍務。○又諭龔裕奏請將疏防隄工。延不修復之知縣。交部議處一摺。湖北前署江陵縣事宣恩縣知縣姜國祺。於隄塍要工。既不能竭力搶護。迨經漫缺成口。又不設法趕築斷流。以致缺口刷寬。多費工貲。轉圖委卸。實屬玩泄。著即交部議處。勒令賠修。該處工程緊要。著照所請。暫於司庫雜款內。借動銀六千兩。

交荊州府督率姜國祺。暨現任知縣俞昌烈。趕緊修復。所借銀兩。嚴飭追繳歸款。○禮部奏。朝鮮國王李昇。以其祖李裊。為其先世戚臣。金龜柱等。誣陷以死。嘉慶辛酉年間。該國邪黨獄起。曾將伊祖李裊。羅入黨案。恐內府編輯。載有其事。懇辨其誣。惟查當日欽奉

上諭。暨會典所載。並無李裊之名。所有該國黨案。既未經載。輯將來自無慮流傳。該國王以先世被誣。備陳枉抑。實係為人後者之至情。應照所請。許其昭雪。從之。○荊州將軍台湧等奏。驍騎校三音阿與文舉人春福。自京回荆。行至湖北鍾祥縣地方。不知去向。咨送署湖廣總督龔裕。提案根究。得旨。認

真究辦。俟查有何情弊。再行具奏。春福尤應嚴訊。尋奏遵查。三音阿。前赴京引見防禦缺。因未經補缺。心常怏怏。與駐防文舉人春福。結伴回家。途中言語顛倒。行至湖北鍾祥縣石牌地方。泊舟後。忽失所在。將同行之春福及船戶等。再四研訊。所供前情相符。堅稱並無別故。三音阿失志忿鬱。走失落水。均難臆料。其為別無疑竇。已可概見。春福於該將軍等委員查訊時。未即詳晰供明。殊有不合。應請照不應輕律。笞四十。下部議。從之。○以順天府府尹鄒鳴鶴為廣西巡撫。○以廣東高廉道宗元醇為順天府府尹。未到任前。以詹事府詹事王慶雲署理。○甲寅。吉林將軍固慶等奏。酌量變通緝盜。

章程。請將原設巡緝捕盜之員。停其專設。遇有賊盜滋擾。隨時揀派緝捕可靠之員。前往嚴密搜捕。例給該官弁等盤費。即作為隨時派去官兵經費。從之。○

上以孟夏時享
太廟。自是日始齋戒三日。○乙卯。諭內閣。徐廣縉。葉名琛。奏。勦辦靈山縣境匪徒。大獲勝仗。全股首夥。盡行殲滅。一摺。覽奏。嘉慰。逸匪黃大一股。自正月擊敗逃竄之後。率眾二千餘人。由竹山坪竄踞那彭墟。經署都司饒成龍。指揮兵勇奮力攻擊。立將黃大槍斃。並轟斃賊匪一百餘名。委員陳義等擊斃三百餘名。餘匪逃入墟內。於墟前排列大礮。施放我軍冒煙。

衝鋒並進。搶得礮位。轉向內轟。並拋擲火礮。墟中周圍火起。燒死四百餘名。外逃各匪。復經署遊擊玉山等。分兵截殺。二百餘名。生擒男婦四十五名。並將黃大之妻賴氏。擒獲。此次統計轟擊。焚殺賊匪首夥。一千五百餘名。生擒二百二十三名。奪獲大小銅鐵礮八十四位。馬八十三匹。槍矛刀械無算。此股首夥各匪。業已勦除殆盡。署都司饒成龍。身先士卒。不避艱險。實屬奮勇。著以應升之缺。即行升用。先換頂帶。在事出力文武各員。均堪嘉尚。著即據實保奏。候朕施恩。傷亡兵勇。查明咨部議卹。其欽州蘇凝三等股。及劉八等匪徒。仍飭該處文武。不分畛域。盡力勦捕。以期羣醜殲除。迅速蕩事。○

又諭。徐廣縉。葉名琛。許乃釗。奏南海東莞。請分別停試一摺。據稱南海縣西湖書院生徒。因挾知府改斷公項之嫌。不遂其欲。投遞匿名罷考紅帖。經該督諭令舉出主謀。餘可免究。尚復容隱不發。東莞縣因抗糧生員。畏罪自戕一案。合邑士子。輒即刷印長紅。徧貼罷考。請將南海縣西湖書院肄業生。童並東莞合學。暫停考試等語。國家設科論秀。原期於風淳俗美之地。選取才良。若士習刁頑。不加懲創。仍使不率教者。得登庠序。而與賓興。將何以勸良士。是以雍正年間。諭旨奉有生童以私心之忿。借罷考為挾制。即令停其考試。聖訓煌煌。於鼓舞人才之中。寓變化愧厲之道。且罷考罪名。綦

重士子束身名教。尤當守法懷刑。廣東近年士氣民情。朕方冀其蒸蒸日上。若因一二敗類。遂致挾制成風。是根莠間生。轉使嘉禾不殖。朕甚愧之。著將南海縣西湖書院肄業生童。及東莞合學。俱暫停考試。該督等。即確查主謀罷考。及附議之人。分別首從。照例懲辦。該書院及該學中。有端謹老成。將首謀者舉出。抑其人悔罪自首。或父兄呈出到官。既肯自新。仍可量從寬典。其脅制被累之同學。經該督等察實奏明。即當許其考試。此朕董教兼施。猶是古人郊遂移風之遺意。凡屬多士。其各懍遵訓誡。毋忽。○又諭龔裕奏。審明同知濫刑釀命。知縣驗訊。屢率請交部嚴議。議處一摺。湖北安陸府同

知多瑞。本無審理案件之責。輒因輕聽差役。濫押民人。擅用刑責。以致鄧正國畏罪服毒身死。又誤指王雙和等。擡屍圖賴。實屬謬妄。多瑞著即行革職。以示懲儆。鍾祥縣知縣馬晉圖。相驗漏填傷痕。並誤審鄧正儒為謀命圖賴。雖未成招定案。驗訊俱屬麤率。馬晉圖著交部照例議處。○諭軍機大臣等。寄諭欽差大臣李星沅等。徐廣縉奏。投誠賊目。迭次殺賊出力等語。據稱廣西賊目張釗。即大頭羊。田芳。即大鯉魚。侯志。即捲嘴狗。關鉅。即大隻具等。經藩司勞崇光。委員查訪。准其投首。責令殺賊自贖。旋經候補知府劉繼祖。督率在金田。勦捕會匪一次。斃匪一百餘名。又在大黃江。勦捕會匪一次。

斃匪一百餘名。奪獲礮械火藥多件。本年二月初三日。進
勦會匪張釗等。皆隨同殺賊。初八日。火燒大黃江。牛排嶺。張
釗等首先施放火箭。焚毀賊巢。似此以毒攻毒。若果辦理得
宜。未始非化盜為民之法。著該大臣等。查覈劉繼祖所稟。是
否確實。其所請俟事竣後。將所帶夥件。給予路票回籍。及不
願回籍者。賞充壯丁之處。徐廣縉議駁甚是。將來如何安插。
或擇其可用者。留營差遣。亦宜豫為籌酌。勿滋流弊。至陶八。
楊撈家兩匪。有無續經投誠。殺賊自效。並張家祥現在何處。
隨營效力。是否帶勇殺賊。尚有微勞。均著隨時奏聞。此等投
首賊目。是否可靠。全在留心控馭。恩威並用。庶不至墮其術。

中也。原片著鈔給閱看。將此由四百里諭令知之。○又諭寄
諭兩廣總督徐廣縉等。前有旨。將高廉道宗元醇升授順天
府府尹。該員現在防勦匪徒。正當喫緊之際。著俟新任道員
薩炳阿到任後。再令來京供職。至該省勦辦匪徒。屢獲勝仗。
此次黃大一股。業已殲除殆盡。餘匪無多。清遠英德一帶。計
不日亦可肅清。即著該督等。察看情形。如粵東賊氛漸靖。即
移兵廣西。合力兜勦。兩路夾擊。以期立淨根株。該督身任兼
圻。責無旁貸。尤當通盤籌畫。無失事機。至該省捐輸。現在成
數若干。廣西調兵較多。需餉孔亟。屢經籌撥。並發內帑。猶恐
緩不濟急。朕甚懸念。該督就近籌酌各款。務當先其所急。勿

致顧此失彼。是為至要。將此由四百里諭令知之。○又諭據哈勒吉那奏。青海蒙古生計維艱。請免派兵駐防一摺。青海各旗蒙古。向設正副盟長。原以約束巡防。藉習武備。茲據哈勒吉那奏。該處王公等。因屢被番賊搶劫。窮蹙日甚。懇請免派駐防兵丁。並將盟長裁撤。繳銷印信。又稱近年以來。該盟長並未帶兵親往。亦未習練武備。似屬有名無實。可否准其裁撤。以示體恤。事關更易舊章。自應詳細體察。著薩迎阿。於路過該處查辦事件之便。察看情形。應如何酌辦之處。據實具奏。原摺著鈔給閱看。將此諭令知之。○實授溫賢。廣東陽江鎮總兵官。○丙辰。諭內閣。戶部錢法堂奏。請飭催銅運等

語。銅運為鼓鑄攸關。斷不容遲延貽誤。現在庚戌年加運一
二起委員。尚未據雲南咨報開行。其己酉年正運四起。吳鴻
昌。加運一起。彭克偁。二起。趙崑。庚戌年正運一起。鄭訓達。正
運二起。王日省。三起。陳步萊。四起。顧恩綬。均於上年及本年
或報自瀘開行。或報自滇啟程。或報已出川境。或報甫入川
境。又湖南委員王秀深。於上年十一月。在清河縣停讓空漕。
江蘇委員黃培庚。於上年十二月。兌竣開行。迄今均未據咨
報行抵何處。著沿途各督撫。及藩臬大員。速查各運銅船行
抵何處。一面報部查覈。一面派委幹員。會同經過地方文武
員弁。無分晝夜。實力迎提。務期於禦黃壩未啟以前。全數趲

抵清江。過壩後。即責成楊殿邦。楊以增押令各運銅船。緊跟首進糧艘。插檔行走。飛輓北上。斷不可如上年跟隨尾幫。漕船輓運。致有遲滯。其未經咨報開行各運。著雲貴總督雲南巡撫。嚴飭廠運各員。迅速開兌開行。毋稍延玩。儻各該運員。藉詞延宕。藩臬大員。及地方官。催趲不力。即指名嚴叅。以肅運務。而資鼓鑄。○先是山西巡撫兆那蘇圖奏。遵辦清查一年限滿。追補數目。請將全完未完各員。分別開復。摘頂勒追。下原議。王大臣議。至是覆奏。山西省清查各屬。虧短銀兩。於一年限內。完繳過半。該撫辦理尚為迅速。但恐有那新掩舊等弊。仍請飭下該撫。嚴密查察。如有前項弊端。即從重叅辦。

從之。○免黑龍江。齊齊哈爾。墨爾根。布特哈。四處。因災借給未完糧銀。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之三十一

實錄卷三十一

大清

